

№ III.

НИКИТЫ ПРЕСВИТЕРА И ИНОКА, ОБИТЕЛИ СТУДИТЬСКИЕ. НАРИЦАЕМАГО СЪВѢСТА, ПОСЛАНІЕ КРИМЛЯНОМЪ О ОПРѢСНОВУ, И ПОСТЪ СУБОТНѢМЪ, И БРАЦѢХЪ СЯЩЕННИЧЕСКИХЪ.

(Тамъ же съ Л. 205-го по 215).

Добро яже въ искренему любви, о всѣхъ языкъ прѣмудрѣйши римляне, и благороднѣйшии. отъ еже бо имати въ искренънему любви, и смѣреніе въ имущему ти изъобилуетъ. сіи же изъобилующи. творить причастника ей вся трыпѣти. вся прѣстрадавати. яко же рече апостоль. и невѣзноситися на ближняго своего. или възиматися нанъ. ниже своя тѣмю искати. или рвеніе имѣти къ нему, и распрю, и тяжбу. вся бо сіа любовь отгонятъ, и смѣреніе. и творять человекъ не ходити по бозѣ, но по человекюгодію. ему же и павель ругается глаголя, идѣже суть въ васъ распря и рвенія. и свары. не плотьсци ли есте. и по человекю ходите: тѣмъ же молю вашу любовь, смѣритися божіа ради заповѣди. и услышати отъ насъ смѣренныхъ и худыхъ. въ прошенъномъ бывшемъ мно-

гаши отъ различныхъ римлянъ, приходящихъ здѣ. о опрѣсноку что глаголемъ любовію христовою къ нимъ: иже опрѣснокъ еще причащающаеся, подъ сѣнію закона суть, и трапезу іудейску ядуть, а не словесную и живую божію. и намъ вѣровавшимъ человекомъ насуществену и единосуществену, якоже испрѣва просити насущственны научени быхомъ хлѣбъ. что бо есть насущственны, развѣ яко намъ въкупосущственъ. иныже нѣсть ни единъ же въкупосущственъ хлѣбъ, развѣ тѣло христово. яко въкупосуществену бывшу намъ по плоти того человѣчества. да аще одушевленно есть существо нашего вмѣшенія, еже слово въсприять. убо не насущственны намъ хлѣбъ ясте, опрѣснокъ причащающаеся. опрѣснокъ бо, явѣ есть яко есть безъдушенъ. Яко же и самое вещей естество, явственнѣйшей учитъ прѣдвѣложши бося малый квасецъ въ вмѣшеніе брашна. и смѣси все съ нимъ. и едино все тѣсто устроивъсе. силою нѣкоею животною съгрѣваетъ тои. и движимо якоже живо съдѣловаетъ. еже въ бескваснѣмъ тѣствѣ фарисеисцѣмъ не бысть, ниже убо коли будетъ. его же и бѣжати намъ слово повелѣваетъ: божественнаго быхомъ обещници естества, его же и причащаемся на всякъ день. общеніе имуще съ христомъ. яко же рече петръ врѣховный апостоломъ благодать вамъ и миръ да умножится въ познаніе божіе. и іисуса господа нашего. и помалѣ. да и сіихъ ради будете божественнаго общници естества. неубо естество божественно кто речеть когда, господь сый помыслу, бесквасное и мертвое тѣсто іудейское. еже въ жертву выи богови приносите и еже якоже въмѣстообразно живыиe плоти господня ясте. какоже и общеніе възимате съ Христомъ, ядуще законныи сѣны, а не новаго завѣта: аще бо и сеи речете, но не сице иматъ рече бо възлюбленны Христовъ ученикъ. аще речемъ яко общеніе имамы съ нимъ, и въ тѣмъ ходимъ, лжемъ и не творимъ истины. аще ли же въ свѣтѣ ходимъ. яко тѣи есть въ свѣтѣ приобщеніе имамы другъ съ другомъ. и кровь Іисуса Христа сына его оцѣститъ ны отъ всякаго грѣха: иже убо опрѣснокы ядыи, въ тѣмъ закона ходитъ. како общеніе възимать съ Христомъ, и съ сущими въ свѣтѣ новаго его завѣта. и благодати. иже убо ядуть тѣло Христово. и пють кровь его пречистую. и тако имуть съ другъ другомъ и съ Христомъ, объ-

щеніе. очищаемый якоже прѣдречеса отъ всякаго грѣха. опрѣснокъ же, не хлѣбъ есть. не бо съврѣшенъ. ниже самосъврѣшенъ. но недостаточень и исполу есть, трѣбующе исполненіе квасца: Смотрите же, яко убо въ опрѣсноцѣхъ. ни една каа есть животнаа сила. мертво бо есть. въ хлѣбѣ же сіи рѣчь. тѣлеса Христовѣ три животна и животъ подающа, иже того достойнѣ ядущимъ. духъ, вода, и кровь. якоже и самъ тѣи напрѣсникъ Христовъ Іоаннъ. съсвѣдѣтельствуеть ми слову. три суть свѣдѣтельствующей рече. духъ, и вода. и кровь. и три въ единомъ суть. сіи рѣчь тѣлѣ Христовѣ. еже и въ время Христова распятія явѣ бысть. внегда вода и кровь отъ прѣчистаго ребра его истече копіемъ прободѣшуся ему, живыи же и святыи духъ. прѣбысть въ обоженной плоти его. юже ядуще мыи въ хлѣбѣ, прѣлагаемъи въ тѣло Христово. живемъ въ немъ. яко живу и обоженну плоть ядуще. такожде и кровь живу и топлотну его піюще, съ истекѣшею водою отъ нетлѣннаго ребра его. очищаемъся отъ всякаго грѣха. и горящаго исполняемся духа. топла бо сущи якоже зрите, якоже отъ ребра господня пиема. понеже отъ плоти живые. духомъ, и топлые христовы. топлотна кровь намъ и вода истече. еже въ ядущихъ опрѣснокъ. не имать мѣста быти да аще мертво мѣсто ясте о прѣмудрїи. якоже слово указа чесо ради хвалитесе глаголюще. яко, не якоже вы и солию и квасъцемъ и водою, брашно мѣсимъ. и тако творимъ възношеніе тѣста нашего. но водою тѣмъ и брашномъ и огнемъ, опрѣснокъ съврѣшаемъ. и тремъ сіими чисту творимъ жъртву нашу: Въпрашаю убо васъ. три сіе, воду и брашно и огонь, въ что приѣмлете. и чесому въ мѣстообразна сіа быти мните. плоти ли господней; но не рече възлюбленныи христомъ іоанъ. три суть свѣдѣтельствующей. вода брашно и огонь. но что; духъ вода и кровь. и три въ единомъ суть, явѣ яко тѣлѣ христовѣ якоже речеса. еже мыи ядуще, съединяемся иже насъ ради въплотомуса богови. сътѣлесны бывающе ему и кость отъ костей его якоже есть писанъно. аще ли же въ несъзданъное и бестѣлесное естество святыи троице. сіа приѣмлете, съгрѣшаете въ богострастникъ впадающе ересь, иже глаголють, съпострадати плоти слова, и того божеству. небо

въкупѣ троица въплотися. отецъ и сынъ и духъ. да зрятся въ
тои сіа трии. вода якоже глаголете, и брашно и огонь. и яко
въмѣстообразно тои творите опрѣсноки въ жрътву приносите. но
единъ святна троице сынъ и слово божіе. въплощься отъ чисти-
ихъ святна дѣвы кровей въчлвѣчися. и вся яже смотреніа съврѣ-
шивъ своего. распята плотію. не пострадавшу его божеству. плотію
убо распенъся, прѣдасть намъ ясти хлѣбъ плоть свою. иже духомъ
живу святнымъ. сице рекъ пріимѣте ядите се есть тѣло мое. еже
о васъ ломимое въ оставленіе грѣхомъ. что убо обще вамъ иже
о Христѣ братіямъ нашимъ, и закону упражненъному Христомъ.
яко еще опрѣсночное тѣсто ясте: нова тварь есмы о Христѣ. дре-
вняя мимоидоша, павла слышите глаголюща, сеи быша вся новая
аще ли же сіе ясти судите, почто и необрѣзуетеся. Христосъ бо
обрѣзася. почто и не очищаетеся по закону, павлу и сеи съдѣявшу.
и инаа вся такожде не соблюдаете ветхаа. елика и сущіи въ
законѣ творять. ихъ же ради имя божіе въ языцѣхъ хулится.
якоже есть писанъно: не добра похвала ваша. да и азъ апостола-
вая провѣщаю къ вамъ. не вѣсте ли рече. яко малъ квасъ
въсе въмѣшеніе къвасить. не о хлѣбѣхъ слово. но что сіа хотя
апостолъ пишетъ ко коринѣомъ. не якоже вы мните, о еже празд-
новати тѣмъ опрѣсноки, никакоже. но понеже оны. ово убо прѣ-
зираху иже мащеху поемшаго. овоже и въ ветхыхъ обычайхъ
льжеименнаго разума ихъ хваляхуся. хотя ихъ павелъ възразити.
и отъ ветхна прѣложити злобы. якоже образомъ сіимъ, къвасомъ
глаголю и въмѣшеніемъ показа имъ. яко едино зло яко мало
прѣзираемо. великъ въ общее тѣло церковное, врѣдъ стваряеть.
Тѣмъ же и наводя рече, и не плакасте, да изъмется отъ среды
вашея. иже дѣло сіе съдѣлавы. можетъ бо рече злоба сіа. въ вся
ваша грады раздатися. якоже малъ къвасецъ, все въмѣшеніе къ-
васить. сице всѣхъ обяти и разъмѣсити. и едино тѣсто. сіи
рѣчь грѣхъ съдѣяти въ всѣхъ великъ. очистите убо ветхія къ-
васъ рече грѣха, да будете ново въмѣшеніе. якоже есте крестивъ-
шесе бесквасны. сіи рѣчь. чисти умертвившесе миру. и похотѣмъ
плотскимъ. ибо пасха наша се есть. яко убо о еже быти намъ
свободномъ отъ грѣха и смерти, пождренъ бысть Христосъ. тѣмъ

же рече празднуимъ, не въ квасѣ ветъсѣ грѣха. ни въ квасѣ злобы и лукавства. но въ безъквасіи чистоты и истины. сіи рѣчь, чиста житіа и вѣры. съ нею же яко бога вѣрующе истинна. истинны поклонницы сему бываемъ. сице бо и великыи григоріе богословъ. глаголь издасть съи. и сице есть о прѣмудріи, съмысль апостольскаго реченіа. а не якоже вы тѣи приеimate. о опрѣсноцѣхъ праздника. и причащеніа. аще бо бы о опрѣсноцѣхъ и тѣхъ празднованы, къ ренѣѣномъ павелъ послалъ, не бы убо предаваа съ единнадесятиими. и въсю правила узаконояа церковь Христову благочестивую. въ ѿ. мѣ правилѣ съ запрѣщеніемъ заповѣдалъ и всѣхъ утвѣрждалъ таковаа отъ іудей не приемати: аще бо вы рече епископъ, или пресвитеръ, или діаконъ. или съвесма отъ съсловія притѣча. поститъ съ іудей или празднуеть съ ними. или приеimate отъ нихъ праздника ихъ чрѣжденіа. сіи рѣчь, опрѣсноцы. или что таковое, да извѣржется. аще ли людинъ, да отлучитъ. аще ли глаголете, не приемати сіе отъ іудей. но творити въ домохъ. что отъ сего. либо аще отъ онѣхъ приеimate. либо аще въ домохъ творите. опрѣсноци суть. и отъ сего паче тяжчайшей приеimate томленіе. яко оставльше яже повелѣны бысте творити отъ Христа, и апостоль его. творите якоже подъ закономъ работы суще. яже творять іудее, въ тѣмъ и сѣни сѣдящей. не покаряющеса сице глаголющу павлу. братіе, каждо въ нѣже званъ бысть чинъ. въ томъ и да прѣбываетъ. не бо обрящется. отнюдь въ божественномъ писаніи, яко опрѣснокъ речеся отъ Христа, или отъ апостоловъ его. вѣнегда тайно учимы бываху отъ него, еже новаго завѣта таинству. павелъ бо убо къ коринѣомъ пиша рече. судите вы еже глаголю. чаша благословленія яже благословляемъ. не общеніе ли крове Христовы есть. хлѣбъ иже ломимъ. не общеніе ли тѣла Христова есть. яко единъ хлѣбъ единое тѣло мнози есмы. вси бо отъ одинаго хлѣба причащаемся. И пакы. азъ бо пріахъ отъ господа еже и прѣдахъ вамъ. яко господь іисусъ въ ноцъ въ нѣже предавашесь, приеимъ хлѣбъ рече, а не опрѣснокъ. и благодаривъ прѣломи и рече. приимѣте ѿ ядите се есть тѣло мое, еже за вы ломимое, се творите въ мое въспоминаніе. и не единою рече хлѣбъ, но множицею и не съи тѣмо, но

и вси евангелисти. матѣей убо. ядущимъ же имъ рече, приѣмъ иисусъ хлѣбъ. благодаривъ прѣломи. и даяше ученикомъ. и рече, приѣмѣте и ядите се есть тѣло мое. тажде же и маръко. подобнѣ же и лука. приѣмъ хлѣбъ и благодаривъ прѣломи. и убо и іоанъ. омочъ хлѣбъ рече, Господь явѣ яко. дастъ іудѣ симону ісхариоту. и по хлѣбѣ тогда вниде въ нь сатана. Сей вси хлѣбъ глаголють. и никааоже опрѣснокъ отъ нихъ въспоминается нигдѣже. понеже бо пострадати подобаше Христу въ тѣи самыи день законныіе пасхы. въ нь же и агнець отъ іудей ждрѣшеса. и хотѣше быти пасха отъ богоубійць. въ день пятка случашеса быти, $\bar{\Delta}1$, луны, въ прѣвый мѣсець. пятотисущьному и пятисѣтъному. и $\bar{\Delta}A$, тому лѣту настоящу. кругъ же бѣ. $\bar{\eta}1$, солнца, $\bar{\epsilon}$, тижѣ луны. да не прѣданъ бывъ не доспѣеть свою пасху ученикомъ прѣдати. възлегъ на вечери въ четвертокъ вечеръ, и по вечери приѣмъ хлѣбъ. и прѣломль прѣдасть апостоломъ таинство новаго завѣта. въ ноци четвертка. въ ню же прѣдася іудомъ, яко же есть писаньно. и не убо бѣху еще опрѣсноци въ четвертокъ онъ. $\bar{\Gamma}1$. ти сущіи лунѣ. зане не еще быти отъятіе квасѣна хлѣба, опрѣсноци бо въ $\bar{\epsilon}1$ ти луны, приѣматися узаконенью бѣи. а въ, $\bar{\Delta}1$, ти агнець токѣмо ждрѣтися. тѣмъже. $\bar{\Delta}1$, ти убо прѣваго мѣсяца луны. пасху именуеть законъ. $\bar{\epsilon}1$. ти же прѣвый опрѣснокъ. въ субботу нарицаеть. да аще. въ $\bar{\Gamma}1$ ти луны. господь таинство прѣдасть въ $\bar{\Delta}1$, ти же агнець ждрѣшеса. въ ньже пождрѣтися. агнець божій, въземляй грѣхы мира. еже есть пятокъ. въ субботу же бѣ опрѣснокъ праздникъ, когда опрѣснокы яде. когда жи ли сіе апостоломъ предалъ естъ Господь, яко глаголете, опрѣснокы отъ апостоль пріакомъ творити. еда по възкресени его отъ мертвыхъ; не видѣти ли яко явственѣ отъ вещей обличаетеся, а яко не бѣху тогда опрѣсноци, егда тайну Христось ученикомъ прѣдасть. укажу вамъ и отъ мовсейскаго законоположенія. рече бо, Сіи праздници господни, и сіи святіи. ихъ же призовете тѣхъ въ врѣмя ихъ. въ прѣвый мѣсець. въ $\bar{\Delta}1$ ти мѣсяца сего. праздникъ пасхы Господеви. и $\bar{\epsilon}1$, ти мѣсяца сего, праздникъ опрѣснокъ Господеви. седѣмъ дній опрѣснокы ясте: сен отъ мовсеова законоположенія навькосте. яко не бѣху тогда опрѣсноци егда вечера

бысть, таинство ученикомъ прѣдаться. егда бо пръвый опрѣснокъ творяху іудене, ѿ ти бѣ якоже сказася. еже есть субота, отъ сего и великъ день нарицашеся. тогда Господь подъ землею бѣи погребенъ. да убо всеу супротивитесе истинѣ братіе: аще бо би вѣдѣли прѣданъно быти отъ апостолъ, ясти опрѣснокъ. супротивилъся би убо крѣпце шестому събору, священныи вашъ папа агаѳонъ. и божественый и священный григоріе акраганъдинъ, и иный мѣсто наплняющей палыно. иже бысть при константинѣ внуцѣ иракліевѣ. вънегда божественнии сїи отци на опрѣснокъ законъ изложиша. ни отъ единого бывати вѣрна. да приложу же слову и сїихъ уставъ. рѣша бо въ ѿ, мѣ своемъ правилѣ сице: никтоже отъ иже въ священныческомъ съпричтенъныхъ чину, или людинъ. иже отъ іудей опрѣснокъ да ясть. или сїимъ да присванетсе. или въ недузѣхъ да призываетъ. или врачбу отъ ныхъ да приемлетъ. или въ бани съ сими отънудъ да мыетсе. аще ли кто сеи съдѣяти начынетъ. аще убо причетникъ есть, да изврѣжетсе. аще ли людинъ, да отлучитсе: да иже убо опрѣснокъ творяху и ядый. аще и не приемлетъ сїихъ отъ іудей. но подражатель онѣмъ въ семъ бывъ. іудеомудренъ есть и законопрѣступникъ. правила и дѣянїа апостолъ и отецъ прѣступаа, и отмѣтаа. якоже слово указа. но убо о опрѣсноцѣхъ вамъ възбраненъно, отъ всего божественнаго писанїа, указахомъ довольнѣ: Принеси же указю вамъ и о постѣ суботънемъ, законопрѣступное. рѣцѣте намъ отъкуду постити суботу приасте. еда отъ апостолъ, не буди тои. апостоломъ бо врѣховъници, въ пятой убо книзѣ вѣщанїихъ ихъ, иже отъ клименъта римскааго епископа написанъныхъ въ немъ же о свѣдѣтелствѣ написася. въ ѿ и главизнѣ ихъ рѣша: Срѣду бо и пятокъ повелѣ намъ постити Господь. ову убо засвѣщанїа іудейскаа. овъ же страсти ради. ту же великую суботу постити прѣдасть. не яко подобаеть суботу постити, яко покоище силы сушу. но яко ону тѣмо подобаеть постити. въ нюже съдѣтель подъ землею бѣи: къ конъцу же кнїигы, сице рече пакы. въсяку убо суботу кромѣ единой. и всяку недѣлю. съвършающе съборы веселитесе. веселитесе подобаеть въ сїихъ, а не плакати: въ книзѣ же тѣхъ жеде завѣщанїи, въ ѿд, и главизнѣ тако рече: Суботу же и не-

дѣлю празднуйте. яко ова убо съдѣтельства есть въспоминаніе. ова же въскресеніа. едина же субота тѣмъ вами съхраняема да есть, въ всемъ лѣтѣ. господня погребенія. юже постити подобаетъ, а не праздновати. въелико съдѣтель подѣ землею есть. крѣпчайшии есть ея и множайшии плачь, отѣя же съдѣтельства радости: Но убо сіа тайно климентомъ папою завѣщавъше, не досего съставиша. но вѣдяще божественнымъ духомъ, не мало прѣступленіе быти, еже постити въ суботу. и запрещеніемъ зѣлымъ завязуютъ о семь церковь. рѣша бо ѡд. мѣ числимѣ, священныхъ правилъ ихъ: аще кый причетникъ обрящется недѣльный день поста. или суботу, развѣ единое тѣмъ да извѣржется, аще ли людинъ, да отлучится: Сему послѣдующей иже въ ѡ соборѣ отци, съгласно сице узаконялають, предстательствующу собору, агаѣону папѣ римскому, сушту и григорію акраганьскому епископу: Понеже увѣдѣхомъ въ римѣ градѣ. въ святую великую поста, четыредесятницу. тоѣ суботы постити, прѣзъ прѣдальное церковное послѣдованіе. изволися святому собору. якоже дрѣжатися въ римской церкви не поколѣблемѣ. правило апостольское глаголющее: аще кый причетникъ обрящется, недѣльный день поста. или суботу, развѣ единое тѣмъ. да извѣржется. аще ли людинъ, да отлучится: Сіимъ сице съгласно апостоломъ правило изложившимъ и научившимъ вѣрныхъ церковь съ папою римскимъ агаѣономъ. выи откуда инуду и отъ кого, постити суботу пріасте: но и еже възношеніе съвршенныя литургіе творити, въ святыя дни поста, развѣ суботы и недѣля. откуда сеи възаконисте. и отъ котораго пріасте учителя, отъ апостоль ли, никакоже. апостоли бо правило о семь изложиша, сице рекше. аще кый пресвитеръ, или діаконъ. или чѣтъць, или пѣвецъ. святую четыредесятницу не постить. или среду и пятовъ да извѣржется, аще ли людинъ, да отлучится. развѣ аще немощію тѣлесною възбраняемъ будетъ: Съвршаемѣ убо съвершенънѣ литургіи въ, ѡ часъ дне. въ ньже и узаконяло жися възноситися жѣртва. како постъ до, ѡ го часъ храните. раздрѣшающе тѣи врѣменемъ литургіе, никако же. да аще се немощно, анаемѣ подпадаете: Гагрьскаго бо събора отци, въ ѡ мѣ правилѣ, тако рѣша: Аще кто отъ постящихъся, кромѣ тѣлесныя

нужде грѣдится, и прѣданъные пости въ общину. и хранимыхъ церковію раздрѣшаетъ, утврѣждающу въ немъ съврѣшенъну помыслу. анаѳема да будетъ: Лаодикійскаго же собора отци. въ ГІ, мѣ правилѣ сице рѣша: яко не подобаетъ въ четыредесятницу мученикомъ трѣжества съврѣшати. но святымъ мученикомъ поменъ творити. въ суботахъ и недѣляхъ: и въ Мн-мѣ правилѣ пакы рѣша тѣи: Яко не подобаетъ, четыредесятницу хлѣбъ приносити. развѣ въ субботу и въ недѣлю тъкмо. Но и въ шестомъ и въселенскомъ съборѣ отци. такожде въ В-мѣ правилѣ узаконяють, съ священнымъ агаѳономъ папою римскимъ. глаголюще сице. Въ сіихъ святыи четыредесятницы постныхъ днехъ. освѣтъ суботе и недѣле, и святаго благовѣщеніа дне. да бываетъ прѣждесвященныхъ священнаа литургіа: тако убо прѣемъше мы. въ субботу службу творимъ и въ недѣлю тогда. въ Г дне часъ вънъже и духъ святыи съниде на апостолы. и приносяще въ тѣхъ освящаемъ дары. отъ нихъже довольнаа всей храняще седъмици. въ другыи дни седмице. въ Ѳ часъ врѣмене. скончавше все пѣснословіе. въдосврѣшени вечерня. творимъ священници съ діаконы входъ. кадильницу тъкмо носяще. и по прочтени пареміи, въображенъные молитвы отъ великаго василіа сътворъше, и дары прѣнесъше отъ прѣдложеніа. и помольшеса надъ ними. еще же и преданъную намъ отъ господа рекше. възвышаемъ прѣжде священныи хлѣбъ, и глаголемъ. прѣждеосвященная святая святымъ. и съединъше причащаемся. хлѣба и чаше таинъ христовѣхъ. и тако благодаривъше отпуцаемъ събраніе. и общее трапезы зеліами и сочиви. и топлыи воды. причащаемся хотящен. суть же иже и съ единѣмъ даромъ благословеніа. еже есть наѳора всю прѣтрьпѣвають седъмицу. вы же възносяще съврѣшенъну на всякъ день въ четыредесятницу литургію. длъжную въ Г часъ дне възноситися. лежащаа прѣступаеете правила церковна, и отъ сего клятвѣ святыихъ отецъ подпадаете яко же речеса: Ктоже есть прѣдавый вамъ. и еже възбраняти и растеръзати бракъ священническъ. кто отъ учитель церковныхъ, сіе вамъ прѣдасть безъмѣстіе. аще бо не оженивъся поставленъ будетъ. таже къ браку устремляется потомъ. по закону възбраненіе. аще ли прѣжде оженився есть, поставлей священникъ. въ чистѣ житіи и цѣломудрѣнѣ. и того

браѣъ раздрѣшающе, законопрѣступници есте: отъ апостольскихъ за-
вѣщани, и священныхъ ихъ укажу правилъ. въ 51, той бо князѣъ.
кълиментомъ папою римскимъ написанъныхъ. въ 51. той главизнѣъ,
апостоли сіа рѣша. епископа, или пресвитера, или діакона. глаго-
лемъ единобрачъномъ поставлятися. любо аще живе суть имъ су-
пружънице. любо аще ни. не лѣтъ же есть тѣмъ по поставленіи безъ-
брачнымъ сущимъ, на бравы приходити. или събрачизшимся иными
сѣчетаватись. но довлѣтиса аще имуще придоша на поставленіе:
въ 5, томъже правилѣ. освященныхъ правилъ ихъ сице рѣша:
епископъ. или пресвитеръ. или діаконъ. свою жену да не изго-
няетъ. виною благоговѣинства. аще же ижденеть, да отлучитса: Въ
11 томъ же правилѣ: да будутъ явленъна рече, особънаа еписко-
пова иманіа. и не узрокомъ церковныхъ иманіи. расточатса епи-
скоповаа. есть егда жену и чада имущу. и сродники, и прочаа:
Аще быубо възбраненъно было, еже священникомъ съ законными
жити женами. не би убо сице вѣрховници апостоломъ, изложили:
аще ли глаголеши жену глаголати апостоломъ церковь. тогда убо би
слово твое явилоса вѣрвно, егда бы въ священныхъ правилѣхъ сво-
ихъ, иже отъ насъ предъреченъныхъ, не велѣли. не изгнати епи-
скопомъ и священникомъ, узрокомъ благоговѣинства своя жены. и
не растакатисе епископову иманію, узрокомъ церковныхъ вещіи.
женъ ради и чадъ ихъ аще будутъ: что же и о святомъ вселенскомъ.
5-мъ съборѣ речеши. не папу ли вашего священнаго агаѳона, яко
же многаци рѣхомъ. прѣвосѣдателя имѣаше. иже въ 60. отецъ
простирашесь. како несупротивъ отвѣща тогда божественный ага-
ѳонъ, святому сему събору. заповѣды изълагающу о законопреступ-
леніихъ, ихъ же нынѣ дръжите. И съ нимъ священный григоріе
абраганъскый епископъ. аще бо бы отъ апостолъ имали сіа прѣда-
ніа. не бы стрѣпѣлъ папа буде вашъ, сіа правила на васъ изло-
житиса. но понеже тужда вѣдаше прѣданіа. и странъна апостоль-
скаго ученіа. сего ради вкупѣ съ всѣми отци. священнаго 5-го
събора. якоже о опрѣсноцѣхъ и постѣ суботнѣмъ и священныя
жъртъвы великыя. четыредесятнице. тако и о брацѣхъ священникъ
узаконоположи сице рекъ: Понеже въ римской церкви, вѣчину
правила прѣдатисе увѣдѣхомъ. хотящихъ діаконъ. или пресвитеръ

сподоблятися хиротоніи. обѣщаватися, яко не къ тому съ своими съчѣтаются женами. мый древнему послѣдующе правилу, апостольскаго опасенія и чина. яже священныхъ мужіи по закону съчѣтанія, и отнынѣ тврѣда быти хоцѣмъ. никакоже тѣмъ къ женамъ съвокупленія раздрѣшающе. или улишающе ихъ еже къ другъ другу, въ вѣрѣмъ прикладное причастіа. тѣмъже аще кто обрящется достоинъ, къ поставленію поддїакона, или пресвитера, никакоже да възбраняется въ сицевый степень възводитися. съ женою живый законною. ниже убо въ вѣрѣмъ поставленія, да истязается обѣщатися яко отъступить законнаго къ своей женѣ съвокупленія: и по малѣ: аще убо кто дрѣзнетъ прѣвъ апостольская правила подвижень. котораго отъ священныхъ. пресвитеръ глаголемъ, или дїаконъ, или поддїаконъ. улишати еже къ законной женѣ съвокупленія же и обѣщенія, да изъвѣржеться. тако же и аще кый пресвитеръ, или дїаконъ. узрокомъ благоговѣнства, свою жену ижденеть. да отлучится. прѣбывая же, да изъвѣржеться. Откуда убо вамъ и отъ котораго. лютаа сіа недугованія найдоша. мужіе римъци премудрѣйшіи. и иныхъ языкъ всѣхъ благороднѣйшіи. нещую яко нѣціи отъ іудей вѣровавшеи прі апостолѣхъ, мшелоимъци и сребролюбци обрѣтѣшеса. и хотяще многы отъ вѣрныхъ отрыгнути отъ благовѣстіа. и убо вѣры проповѣдь прирастлиша. заеже проповѣдати тѣмъ въвупѣ и христіанство. сущихъ о симонѣ и димасѣ. николиже и клеовѣ глаголемъ: И вѣрховніи же апостоломъ. въ шестой книзѣ завѣщаніи. въ главизнѣ. 51. той изъявленнѣе рѣша: Вѣмы бо рече. яко о симонѣ и клеовѣ, съчинивше книгу именею христовѣмъ, и ученикъ его. обносятъ въ прѣльщеніе ваше, и иже христовы рабы: И въ ветъхомъ же нѣціи, съписаше кънигы утаенныи. мовсеа. и еноха. адама. исаіе же. и давида. и иліе, и трехъ патріархъ. тлетворніи и истинѣ вѣраждебны: но и павла господня апостола. сіа якоже мню проувѣдѣвша. тако въ васъ произыти отъ таковыхъ, словомъ объявляюща вамъ, филипписіомъ писати: Блюдѣте пси. блюдѣте злыа дѣлателе. блюдѣте съсѣченіе: И тимоеови пакы. въ послѣднихъ вѣременехъ рече. отступать нѣціи отъ вѣры. вѣнемлюще духовомъ лъсти и ученіемъ бѣсовъскимъ. въ лицемѣрїи лъжесловѣць. и съжеженнымъ своею съвѣстію. възбраняю-

щїимъ женитвы. ошаятиса брашенъ. и прочая: и титу: обличаи
тѣхъ рече нагло. да здравьствують въ вѣрѣ. не внемлюще іудейскы-
ма снемъ. и заповѣдемъ чловѣчьскимъ, отвращающїихъ си истинны:
да убо извѣстїѣ испытайте о семъ възлюбленїи. еда како отъ
таковыхъ реченная и обличенная, ядовитая недугованїа. Глаголю
же опрѣсновы, суботный постъ. бракъ священънический. и яже въ
постѣхъ приношенїа. прїасте и навькъше нынѣ безмѣстїе ихъ отъ
богодѣхъновеннаго писанїа. хранитесе таковаа творити, церкви суще
божіа. и въсей въселеннѣй присносветуще очи. да съединьшеса съ
вами нашими братїами. иже реченъныхъ ради раздрасте тѣло хри-
стово сущїихъ. откровенъномъ лицемъ славу господню съзрьдаемъ.
въсѣгласнѣ единомыслии православныя вѣры. и тѣжде образъ прѣ-
образуемїи. отъ славы единое и тожде. въ славу вѣчную. якоже
отъ господа духа. яко тѣй есть глава тѣлесе церкви нашее. и
въ немъ вси мы исчланенъны бываемъ: Сїа римляномъ вамъ: аще
убо повинuemъ васъ чловѣкы суще, ими же рѣхомъ. и съ ними
же вамъ вѣдящїимъ. добро духу повиноватиса, и послѣдовательнѣ
слову въздвизающу. благо же о вещи: аще ли же ни, дадите намъ
свѣдѣтельства отъ божественныхъ писанїи, съставляющїихъ васъ. о
нихъ же воленъравьствующе якоже на прѣстолѣ чювьствъ почи-
ваете. И мнѣ вѣдяще повиноватиса не крѣчьмъному словесы духа,
молчанїе къ вамъ лобызаемъ. о христѣ іисусѣ господѣ нашемъ.
ему же слава и дрѣжава. съ отцемъ и святымъ духомъ. нынѣ и
прїсно и въ вѣкы вѣкомъ. аминь: